


四明叢書

張宗祥



序

昔讀周鄮山自序文引子輿氏論世知人之說又曰後之君子閱諸篇悲我志焉嗚呼當鼎革之後抱故國之思情不自禁流露於行間字裏騷人幽客其致同也管邨先生萬戶部之冢孫也其父斯年嘗受業錢忠介之門預於江上義師其撰母夫人傳所謂東江兵潰盡室避之奉化榆林轉徙顛沛家道喪失樵蘇不繼借米而炊昔之辛苦艱難既如此洎夫預修明史欲借文字以伸己意忍氣覲顏之下又復時時倔強以致直道不容

奸人深計改外未久卽遭罪愆幾瀕於死多方拯救獲免後之困橫拂亂又如彼夫士不伸志於世又復因衣食憂患以廢日力儆其精神學之所成往往不可得而管邨先生則所歷愈艱所蓄愈厚與諸同學講論經義衡斷得中序史表至謂于斯世之治亂生人之休戚淡然無與則雖積之至於充棟終無當於著書之數也其立論深切爲何如哉且卽以文論震川之古澹剡源之邑澤黎洲許之者非虛諸父季野曰使我有汝筆班馬不難企也推崇之者亦至顧沈淪於今未見刊本則何

也攷謝山表西郭墓有云其開雕管邨文集尙未畢也
吾不知當時果有畢之者否又西郭先集告成文曰播
遷散失篇多不全吾不知所謂不全者果盡由於散失
者否今就其文觀之如交司馬公於絕島四方有事於
某公與某公有事於四方云云皆不敢著其名則知其
時文字之禁一切有所顧忌而其未畢者蓋不能畢其
不全者蓋不敢全也非論其世烏乎知之余小子旣得
先生文鈔於童君賡年藏之久矣更得馮君孟顓收藏
煙嶼樓舊鈔本手爲校勘付諸梓論其世可知其人讀

其文益悲其志誠有合於周鄧山所云者爰述所見質
諸邦人君子是爲序時民國十九年十一月後學張壽
鏞

萬貞一集序

余於里中最稱萬貞一之文幾二十年矣貞一少事大父父得傳家學復從諸叔父學於黎洲黃先生之門先生初爲余言貞一古文兼有剡源震川兩家之妙其才不易得余以是益自信余嘗謂與萬氏父子孫三世交而俱心師之謂悔菴先生之風格季野之學問貞一之文筆是也其後貞一文日高其名日益盛十年以來余所見一時當軸諸公所在虛左以候其名版之至改席易衣然後請見上公則重其典冊高文將軍亦愛其飛

書走檄而貞一之文遂爲當世所重雖然余竊爲貞一惜之使以貞一之才得保其十世故宅西舉墓田裁足給衣食即可杜門蔽竹仰對屋梁著書月積歲成豈復可量今乃爲飢火所驅使陸陸道上一造記席便當役我妙筆曲寫他人所欲言卽爾酬世之作亦復軼倫足使諸公心折而不知貞一所可傳固自有在也且文章之事至今日難言之矣余謂凡一切牋軸屏版應俗之文俱如置驛當衢供張候過客漿酒釐肉取足充具卽此人操觚亦未嘗自目爲古文思爭此一坐固不必復

論若夫得與文章之事確以作者自命斐然可觀其敝
亦有二自弇州極媚歷下推爲西京兩司馬至近日華
亭陳大樽諸君益傳之震川力追唐宋諸大家首斥弇
州庸妄至近日豫章艾天傭諸君益傳之然彼學兩漢
者徒襲龍門蘭臺之詞固誠馬班之掾史也此學八家
者徒襲廬陵南豐之詞則亦歐曾之掾史也此其敝謂
譏而無本至所傳駢耦工麗之文祖構於東漢而俊極
於子山義山亦足備文章之一體然其學事不必究其
始終人不可考其本末碎句斷章晉頭漢尾略取形肖

遂吐詞華雖復味調於聚鱗而色爛於合組然其敝謂之側而不正若吾貞一之文則不然其學一本於通經一本於讀史服習聖賢貫串紀傳每有所作煥然而興無不發其識之所起縱其才之所至而止而自闔合於古人之法初未嘗取昌黎廬陵一大家之言爲之模範於前也吾每望見貞一文卽人馬辟易矣適貞一將客長安偶出其篋中所攜經余點定者一二卷先以問世當世詞家讀貞一之文必有歎服吟研十倍於余者余方與梨洲先生相視而笑曰諸君愛貞一之文固當但

後於吾兩人既二十年矣李文胤

此杲堂序言也杲堂更有與先生書並錄於首可以
見先生學問淵源與夫老輩風流獎勉周摯之意云
壽鏞識

文胤頓首貞一萬兄足下僕聞古之學者莫重於得其
師自夫子而後七十子之徒各以其學轉相授受不絕
至漢興專經之業亦必有所傳然後其學得立然一時
學者能得其師之所傳固亦不易也方未得其師則有
負笈相追躡屨千里之外者及既得其師則有願身爲

都養求給灑掃之役者亦有及門而莫見其面三年而猶未入其室者蓋得其師而事之與既從師而能得其傳其難若此自貞一與其諸父及里中十餘君子同事姚江梨洲黃先生而萬氏與先生更爲三世通家自貞一爲童子時輒聞其大父父所教知先生爲海內模楷率以爲師而吾鄉去姚江百里潮汐可通貞一時登先生之堂言侍從容極師弟子之樂而先生因授諸生以所傳戴山慎獨之學發古今說經諸書爲世所未傳者點定西漢唐宋及先輩大家文鈔不煩探索而坐辯千

載是非較然明白以脉古人前此得師之難與後此從
師而得其所傳之難其爲勞與逸相去幾何斯真諸君
子之幸也然貞一之才更爲先生□□□□每一下筆
獨出冠時先生常稱其文謂有震川之古澹兼以剡源
之色澤故每道貞一不容口若貞一由此而造於歐曾
大家所去咫尺閒耳然貞一苦家貧自其年少輒已爲
人師藉其資以自給僕意貞一所以教其門人不過如
世俗之師作誥訓章句工爲揣摩場屋之言以圖取富
貴與其所得於師固判無一合者也夫貞一所傳於師

若此而其所授於門人若彼得無自背其學乎然貞一
非以此教其門人卽人不奉以爲師不得更藉其資以
自給僕謂以貞一之才但出其餘力卽足以答諸生之
問非必與亶亶終日也僕願貞一忘其身之爲人師而
謹守其師之傳常若身在弟子之列以學其所學而無
反逐弟子之學徒相與共爲揣摩場屋之言以圖取富
貴而自負其所傳之重此則僕所望於貞一者也頃者
先生書來欲引僕與萬鄭陳范諸君子共與於文章之
事使浙河以東斯文蔚起其所屬於貞一甚厚意先生

平日以此相勉固非朝夕而復以語僕亦謂僕與貞一
其交殊不薄必當舉先生之言其相策勵使五經季興
復續文章之統此真今日事也至先生於僕其引爲忘
年之交已二十餘年閒辱先生之知以爲可教然以眎
貞一師弟子之傳固大不同也獨僕以蚤廢不知揣摩
場屋之言人不以爲師雖苦於夙疾猶彊從藥石之閒
稍著文章自娛閒有合處爲先生所許是僕雖不若貞
一之得其師而猶幸其身之得不爲人師也敬列君
師之言陳諸左右惟勉力自勵幸甚

傳一 寧波府志文苑傳

萬言字貞一鄞人泰之冢孫父斯年郡諸生從錢肅樂爲制義肅樂死收其文爲之立嗣言生而穎異特達與諸父斯選斯大斯同學於黃宗羲善古文豪邁精湛宗羲屈指後起作者惟言與慈谿鄭梁二人同里講經之集彙諸先儒之說參酌異同議論每奪席康熙乙卯副浙榜貢入京師以教習期滿授知縣需次明史館開總裁徐元文特薦七人言與焉欽召纂脩授文林郎食翰林七品俸兼脩大清一統志在館五年多所撰著已

授江南五河知縣縣瀕大河修築塘堰蓄洩以時又日
與諸生講道論藝文教聿興訟獄平允苞苴屏絕各院
司將以廉能首薦而制府嫉其剛直改置計典論罪仕
路交游爲醵金贖免所學弗竟其遠且大者人咸惜之

傳二 鄞縣志人物傳

萬言字貞一號管村

萬承勳撰先府君墓志

斯年子生而穎異特

達

曹志

少與諸父斯大斯同學於黃宗義

浙江通志

以古文名

國史附萬斯大傳

宗義極賞之

錢志

謂屈指後起作者惟言與慈

谿鄭梁二人

曹志

斯同亦曰使我有汝筆班馬不難企也

錢志

同里講經之集彙諸儒先之說參酌異同議論每奪

席

曹志

康熙十四年中副榜考正紅旗教習期滿需次知

縣

墓志

明史館開總裁徐元文特薦七人言與焉

曹志十九

年應召纂脩食翰林院七品俸兼脩盛京通志一統志